

आकाशवाणी

1. प्रधानमंत्री नरेन्द्र मोदी होर अज्ज गुजरात दे जूनागढ़ जिले दे सासन गिर च राष्ट्रीय वनजीव बोर्ड दी बैठक दी अध्यक्षता करगंन।
2. गृह ते सहकारिता मंत्री अमित शाह होर नमीं दिल्ली च डेयरी खेत्तर च निरंतरता ते संसाधने दा मते कोला मता इस्तेमाल पर इक कार्यशाला दा उद्घाटन करगंन।
3. दिल्ली च बीजेपी दी सरकार 8 मार्च कोला महिला समृद्धि योजना दे तैहत लाभार्थिगं गी ढाई ज्हार रपे महीने देने लेई नां दर्ज करने दी प्रक्रिया शुरू करी देग।
4. लॉस एंजेलिस च आयोजित 97में अकादमी अवार्ड समारोह च जो सल्दाना गी बेहतर सहायक अभिनेत्री दा आस्कर पुरस्कार थोआ ऐ।
5. ब्रिटिश प्रधानमंत्री कीर स्टारमर होरें यूक्रेन लेई सफल शांति समझौते आस्तै चार सूत्री योजना तैआर कीती।
6. आईसीसी चैंपियन्स ट्रॉफी दे इक मैच च न्यूजीलैंड गी 44 रंजें कन्नै हराइयै भारत ग्रुप-ए च सब्बने शा अव्वल, पैहले सैमीफाइनल च कल भारत दा मकाबला आस्ट्रेलिया कन्नै होग।

<><><><><><>

PM Gujrat Visit

प्रधानमंत्री नरेन्द्र मोदी होर अज्ज गुजरात दे जूनागढ़ जिले च विश्व वनजीव दिवस दे मौके पर वन्य जीवें कन्नै सरबंधत राष्ट्रीय वनजीव बोर्ड दी बैठक दी अध्यक्षता करगंन। राष्ट्रीय वनजीव बोर्ड च सेना अध्यक्ष, केई राज्यें दे प्रमुख, इस खेत्तर च कम्म करा'रदे गैर सरकारी संगठनें दे प्रतिनिधि, मुख्य वन्य जीव वार्डन ते केई राज्यें दे सचिवें समेत कुल 47 सदस्य न। इस बैठक दे बाद प्रधानमंत्री होर सासन च जंगलात मैहकमे च सेवा देआ'रदियां किश महिला कर्मिगं कन्नै गल्लबात करगंन। प्रधानमंत्री होर गिर राष्ट्रीय उद्यान च जंगल सफारी दी सुआरी बी करगंन। जंदे कल प्रधानमंत्री होर वंतारा च पशु राहत ते पुर्नवास केन्द्र दा दौरा कीता हा। मोदी होरें सोमनाथ मंदर दा बी दौरा कीता ते उत्थें पूजा अर्चना कीती। उनें श्री सोमनाथ ट्रस्ट दी बैठक दी अध्यक्षता बी कीती। प्रधानमंत्री जंदे शनिवारें कोला गुजरात दे त्रै दिनें दे दोरे पर न।

<><><><><><><>

HM Animal Husbandry

केन्द्रीय गृह ते सहकारिता मंत्री अमित शाह होर अज्ज नमीं दिल्ली च डेयरी क्षेत्र पर इक कार्यशाला दा उद्घाटन करगन। कार्यशाला च सहकारिता मंत्रालय ते पशुपालन, डेयरी ते मच्छी पालन मंत्रालय दी नीतिएं दे पैहलुएं पर ध्यान केन्द्रित कीता जाग। एहदा उद्देश्य पर्यावरणीय जिम्मेदारी दे कन्नै आर्थिक विकास गी सुनिश्चित करदे होई टिकाऊ डेयरी फार्मिंग गी बढ़ावा देना ऐ। कार्यशाला दे दरान केई राज्यें च बायोगैस सयंत्र लाने लेई समझौता ज्ञापन पर दस्तखत कीते जांगन। एहदे च टिकाऊ खाद्य प्रबंधन मॉडल पर तकनीकी सत्र बी आयोजित होंगन, जेह्दे डेयरिंग च निकलने आले गोहूँ गी बायोगैस ते जैविक हैल च बदलदे न।

<><><><><><><>

Delhi Women Policy

दिल्ली च बीजेपी दी सरकार 8 मार्च कोला महिला समृद्धि योजना दे तैहत् महिलाएं गी ढाई ज्हार रपे महीना देने लेई नां दर्ज कराने दी प्रक्रिया शुरू करी देग। दिल्ली विधानसभा चुनां दे दरान बीजेपी नै सरकार च औने पर माली तौरा पर कमजोर वर्गें दिएं महिलाएं लेई एह योजना शुरू करने दा वायदा कीता हा। इस बारे जानकारीह दिंदे होई दिल्ली थमां बीजेपी दे सांसद मनोज तिवारी होरें आखेआ जे इक महीने दे अंदर अंदर सब्बने योग्य महिलाएं दी पंछान करी लैती जाग ते इस स्कीम तैहत् पैहा उंदे खाते च पाने दी प्रक्रिया बी शुरू होई जाग।

<><><><><><><>

Delhi Assembly

दिल्ली विधानसभा च मुखमंत्री रेखा गुप्ता हुंदे आस्सेआ 28 फरवरी गी विधानसभा च पेश कीती गेदी सीएजी रिपोर्ट पर चर्चा अज्ज परतियै शुरू होग। एह रिपोर्ट दिल्ली सरकार दे तैहत् सार्वजनिक सेहत बुनियादी ढांचे ते सेहत सेवाएं दे प्रबंधन बारे 2016–17 कोला लेइयै 2021–22 तोड़ी दी आडिट जांच पर आधारित ऐ। इस रिपोर्ट च कोविड दे दरान उपलब्ध फंडे दा पूरा इस्तेमाल नेई करने, परियोजनाएं च देरी ते अस्पतालों च दोआइयें ते स्टाफ दी

कमी दी गल्ल सामने आई ऐ। रिपोर्ट च दस्सेआ गेदा ऐ जे पिछली सरकारै कोविड दरान केन्द्र कोला 788 करोड़ रपे हासल कीते पर उंदे चा छड़े 543 करोड़ रपे खर्च कीती गे।

<><><><><><><>

Oskar

लॉस एंजिल्स च आयोजित 97में अकादमी पुरस्कार समारोह च “एमिलिया पटेल” फिल्म लेई “जो सल्दाना” नै बेह्तरनीन सहायक अभिनेत्री दा आस्कर खताब हासल कीता ऐ। इस मौके पर उनें आखेआ जे एह सम्मान हासल करियै ओह मतियां खुश न। तोआई कीरन कल्किन गी “ए रिअल पेन” लेई बेह्तरनीन सहायक अभिनेता दा आस्कर दित्ता गेआ ऐ। इससै चाल्ली सीन बेकर दी फिल्म “अनोरा” गी बेह्तरनीन फिल्म एडिटिंग दा पुरस्कार दित्ता गेआ ऐ।

<><><><><><><>

India-US

भारत ते अमरीका प्रस्तावित दपक्खी बपार समझौते लेई गल्लबात शुरू करने दी तैआरी च न। एहदे लेई बपार ते उद्योग मंत्री पीयूष गोयल अज्जै थमां वाशिंगटन दे दौरे पर होंगन। उंदे अमरीका दे बपार प्रतिनिधि जैसीमन ग्रीर ते अमरीका दे बंज बपार मंत्री हॉवर्ड लुटनिक हुंदे कन्नै मलाटी लाने दा बी कार्यक्रम ऐ। प्रधानमंत्री नरेन्द्र मोदी हुंदी हालिया अमरीका यात्रा दरान, भारत ते अमरीका नै 2030 तगर दो तरफा बपार च दूने कोला मता बाद्धा करदे होई इसी 500 अरब अमरीकी डॉलर तगर पजाने ते 2025 दे खीरे तोड़ी बक्ख-बक्ख क्षेत्रें च दपक्खी बपार सरबंधी समझौते बी.टी.ए लेई शुरुआती गल्लबात करने दी अपनी वचनबद्धता गी फही पक्का कीता हा। पिछले म्हीने गोयल होरें आखेआ हा जे भारत ते अमरीका दपक्खी बपार गी 500 अरब अमरीकी डॉलर तगर पजाने ते अगले 6 कोला 8एं म्हीने अंदर इक निगगर समझौते लेई गल्लबात लेई प्रतिबद्ध न।

<><><><><><><>

India Bangladesh

भारत ते बंगलादेश दे नदिएं सरबंधी माहिर अज्ज पच्छिम बंगाल दे फरक्का दा दौरा करगन। एह दौरा दिसम्बर 2026 च खतम होआरदे गंगा जल समझौते दी मयाद बधाने दे सिलसिले च फरक्का च पानी दे स्तर दी समीक्षा करने लेई कीता जा'रदा ऐ। दौनें मुख्खें दे सांझे नदी आयोग जेआरसी दे मिंबर मोहम्मद अबुल हुसैन हुंदी अगुवाई च 11 मिंबरी बंगलादेश दा इक

दल भारतीय प्रतिनिधिमंडल कन्नै फरक्का पुज्जा करदा ऐ। बंगलादेश दे माहिर 7 मार्च गी पच्छम बंगाल दे सिचाई सचिव मनीष जैन हुंदे कन्नै बैठक करगन। जल शक्ति मंत्रालय दी जानकारी मूजब भारत ते बंगलादेश बश्कार 54 नदिएं दी सांझ ऐ जिंदे पानी दे इस्तेमाल गी लेइयै दौनें मुल्खें बश्कार समझौता ऐ।

<><><><><><>

Europe Ukraine

ब्रिटिश प्रधानमंत्री कीर स्टारमर होरें यूक्रेन लेई सफल शांति समझोते आस्तै चार सूत्री योजना तैआर कीती ऐ। एहदे च आखेआ गेआ ऐ जे बाकी यूरोपीय सैहयोगिएं दे कन्नै मिलियै ब्रिटेन यूक्रेन दी धरती पर जवानें ते लड़ाकू जहाजें दी मजूदगी बधांदे होई यूक्रेन दी मदद करने आस्तै तैआर ऐ। प्रधानमंत्री स्टारमर होरें आखेआ ऐ जे यूक्रेन दा समर्थन करने आस्तै कुसै बी नमें समझोते च सैन्य मदाद शामिल होनी लोड़चदी ऐ ते सब्बने समर्थक देशें गी जिम्मेदारी लेंदे होई अपना हिस्सा बधाइयै जिन्ना मुमकिन होई सकै उन्ना योगदान देना लोड़चदा ऐ।

<><><><><><>

ICC-Champions Trophy

आईसीसी चैंपियन्स ट्राफी दे अपने खीरी लीग मैच च कल भारत नै न्यूजीलैंड गी 44 रंज कन्नै हराई दित्ता। जेहदे बाद हुन सैमीफाइनल च भारत दा मकाबला आस्ट्रेलिया कन्नै होग। कल दिनै न्यूजीलैंड नै टॉस जित्तिyै भारत गी बल्लेबाजी करने लेई साददा दित्ता। भारत नै 50एं ओवरें च 9 विकटें दे नुकसान पर 249 रंज बनाए। जेहदे च श्रेयस अय्यर दे 79 ते हार्दिक पांडेया दे 45 रंज दा योगदान शामिल रेहा। जित्त लेई लोड़चदे 250 रंज दे लक्ष्य दा पिच्छा करदे होई न्यूजीलैंड दी पूरी टीम 205 रंज गै बनाई सकी। पैहला सैमीफाइनल कल दुबई च खेड्देआ जाग जिसलै जे दुए सैमीफाइनल च अत्तरूं बुधवारें लाहोर च न्यूजीलैंड ते दक्खन अफ्रीका दियां टीमां आमने सामने होंगन।

<><><><><><>

Maharashtra Budget

महाराष्ट्र विधानसभा दा बजट सत्र अज्ज राज्यपाल सी.पी.राधाकृष्णन हुंदे अभिभाषण कन्नै शुरू होग। उपमुख्यमंत्री ते खजाना मंत्री अजीत पवार 10 मार्च गी बजट पेश करगंन। मुख्यमंत्री देवेन्द्र फडणवीस होरें आखेआ ऐ जे राज्य सरकार इक पूरी चाल्ली तवाजन आला बजट पेश करोग जेह्दे च हर कुसै दा ख्याल रखेआ जाग। उनें भरोसा दोआया जे बजट च कुसै बी प्रमुख योजना गी बंद नेई कीता जाग। मुख्यमंत्री होरें अग्गे आखेआ जे सरकार बजट सत्र च सब्बने बिलें पर चर्चा करने लेई तैआर ऐ। उनें विरोधी धडेंग ी इजलास पूरी चाल्ली रमानदारी ते बवस्था आले ढंगै सिर चलाने लेई सैहयोग देने लेई बी आखेआ। महाराष्ट्र असेंबली दा बजट सत्र 25 मार्च तोड़ी जारी रौहग।

<><><><><><>

Weather

मौसम विभाग नै अज्ज जम्मू कश्मीर, लद्दाख, गिलगित, बाल्टिस्तान, मुज्जफराबाद ते हिमाचल प्रदेश च बक्ख-बक्ख इलाकें च तेज बरखा ते बर्फबारी होने दी पेशगोई कीती ऐ। विभाग दे मूजब कर्नाटक दे समुंद्र कन्नै लगदे बक्ख-बक्ख इलाकें च गर्म ब्हाह चली सकदी ऐ। मौसम विभाग ने कोंकण ते गोवा च अगले दऊं दिनें तगर गर्मी ते गुम्मे आली स्थिति बनी सकने दे बी आसार दस्से न। विभाग नै अगले 24 घैंटे दे दरान मध्य भारत च बद्धोबद्ध तापमान च कोई महत्वपूर्ण बदलाव नेई होने दी पेशगोई कीती ऐ।

<><><><><><>